

草木典第一百三十二卷

當歸部彙考

釋名

薛爾雅

白蘄爾雅

山蘄爾雅

當歸爾雅注

乾歸本經

文無綱目

當歸圖



爾雅 釋草

薛音百山蘄

注

廣雅曰山蘄當歸當歸今似蘄而粗大

疏

說文云蘄草也生山中者一名薛一名山

蘄色白者名白蘄下文薛白蘄是也生平地卽名蘄案廣雅張揖撰以廣爾雅之闕漏也曰山蘄

當歸者言卽今藥草當歸案本草當歸不言名薛及山蘄是卽以時驗而言也故郭云今似蘄而粗大言似平地蘄而差粗大耳

薛白蘄

注

卽上山蘄

東坡雜記

四神丹說

熟地黃元參當歸羌活各等分列仙傳有山圖者入山採藥折足仙人教服此四物而愈因久服遂度世余以問名醫康師孟大異之云醫家用此多矣然未有專用此四物如此方者師孟遂名之曰四神丹洛下公卿士庶爭餌之百疾皆愈藥性中和可常服大略補虛益血治風氣亦可名草還丹

本草綱目

當歸釋名

蘇頌曰按爾雅薛山蘄又云薛白蘄薛音百蘄卽古芹字郭璞注云當歸也似芹而粗大許慎說文

云生山中者名薜一名山蘄然則當歸芹類也在平地者名芹生山中粗大者名當歸也

寇宗

奭曰今川蜀皆以畦種尤肥好多脂不以平地山中爲等差也

李時珍曰當歸本非芹類特以

花葉似芹故得芹名古人娶妻爲嗣續也當歸調血爲女人要藥有思夫之意故有當歸之名正與唐詩胡麻好種無人種正是歸時又不歸之旨相同崔豹古今注云古人相贈以芍藥相招以文無文無一名當歸芍藥一名將離故也

陳承曰當歸治妊婦產後惡血上衝倉卒取效氣血昏亂者服之卽定能使氣血各有所歸恐當歸之名必因此出也

集解

別錄曰當歸生隴西川谷二月八月採根陰乾

陶弘景曰今隴西西陽黑水當歸多肉少枝氣

香名馬尾當歸西川北部當歸多根枝而細歷陽所出者色白而氣味薄不相似呼爲草當歸缺少時亦用之

蘇恭曰今出當州宕州翼州松州以宕州者最勝有二種一種似大葉芍藥者名馬

尾當歸今人多用一種似細葉芍藥者名蠶頭當歸卽陶稱歷陽者不堪用莖葉並卑下於芍藥

蘇頌曰今川蜀陝西諸郡及江寧府滁州皆有之以蜀中者爲勝春生苗綠葉有三瓣七八月開花

似時蘿淺紫色根黑黃色以肉厚而不枯者爲勝 李時珍曰今陝蜀秦州汶州諸處人多栽時爲貨以秦歸頭圓尾多色紫氣香肥潤者名馬尾歸最勝他處頭大尾粗色白堅枯者爲鑷頭歸止宜入發散藥爾韓悉言川產者力剛而善攻秦產者力柔而善補是矣

根修治

雷斅曰凡用去蘆頭以酒浸一宿入藥止血破血頭尾效各不同若要破血卽使頭一節硬實處若要止痛止血卽用尾若一併用服食無效不如不使惟單使妙也 張元素曰頭止血尾破血身

和血全用卽一破一止也先以水洗淨土治上酒浸治外酒洗過或火乾日乾入藥 李杲曰頭

止血而上行身養血而中守尾破血而下流全活血而不走 李時珍曰雷張二氏所說頭尾功

效各異凡物之根身半已上氣脈上行法乎天身半已下氣脈下行法乎地人身法象天地則治上當用頭治中當用身治下當用尾通治則全用乃一定之理也當以張氏之說爲優凡曬乾乘熱紙封甕收之不蛀

氣味

苦溫無毒

別錄曰辛大溫

吳普曰神農黃帝桐君扁鵲甘無毒岐伯雷公辛無毒李當之

小溫

李杲曰甘辛溫無毒氣厚味薄可升可降陽中微陰入手少陰足太陰厥陰經血分

徐之才曰惡菌茹濕麪畏菖蒲海藻牡蒙生薑制雄黃

主治

本經曰欬逆上氣溫瘧寒熱洗洗在皮膚中婦人漏下絕子諸惡瘡瘍金瘡煮汁飲之

別錄曰

溫中止痛除客血內塞中風瘧汗不出濕痺中惡客氣虛冷補五臟生肌肉

甄權曰止嘔逆虛

勞寒熱下痢腹痛齒痛女人瀝血腰痛崩中補諸不足

大明曰治一切風一切氣補一切勞破

惡血養新血及癰瘕腸胃冷

李時珍曰治頭痛心腹諸痛潤腸胃筋骨皮膚治癰疽排膿止痛

和血補血

王好古曰主痿痺嗜臥足下熱而痛衝脈爲病氣逆裏急帶脈爲病腹痛腰溶溶如

坐水中

發明

甄權曰患人虛冷者加而用之

陳承曰世俗多謂惟能治血而金匱外臺千金諸方皆爲人補

不足決取立效之藥古方用治婦人產後惡血上衝取效無急於此凡氣血昏亂者服之卽定可以補虛備產後要藥也 寇宗奭曰藥性論補女子諸不足一說盡當歸之用矣 成無己曰脈

者血之府諸血皆屬心凡通脈者必先補心益血故張仲景治手足厥寒脈細欲絕者用當歸之苦溫以助心血 張元素曰其用有三一心經本藥二和血三治諸病夜甚凡血受病必須用之血

壅而不流則痛當歸之甘溫能和血辛溫能散內寒苦溫能助心散寒使氣血各有所歸 王好

古曰入手少陰以其心生血也入足太陰以其脾裹血也入足厥陰以其肝藏血也頭能破血身能養血尾能行血全用同人參黃耆則補氣而生血同牽牛大黃則行氣而補血從桂附茱萸則熱從大黃芒硝則寒佐使分定用者當知酒蒸治頭痛諸痛皆屬木故以血藥主之 汪機曰治頭痛

酒煮服清取其浮而上也治心痛酒調末服取其濁而半沈半浮也治小便出血用酒煎服取其沈入下極也自有高低之分如此王海藏言當歸血藥如何治胷中欬逆上氣按當歸其味辛散乃血中氣藥也況欬逆上氣有陰虛陽無所附者故用血藥補陰則血和而氣降矣 韓愈曰當歸主

血分之病川產力剛可攻秦產力柔宜補凡用本病宜酒制有痰以薑制導血歸源之理血虛以人

參石脂爲佐血熱以生地黃條芩爲佐不絕生化之源血積配以大黃要之血藥不容舍當歸故古方四物湯以爲君芍藥爲臣地黃爲佐芎藭爲使也

附方

血虛發熱當歸補血湯治肌熱燥熱困渴引飲目赤面紅晝夜不息其脈洪大而虛重按全無力此

血虛之候也得於饑困勞役證象白虎但脈不長實爲異耳若誤服白虎湯卽死宜此主之當歸身

酒洗二錢絲黃耆蜜炙一兩作一服水二鍾煎一鍾空心溫服日再服

東垣蘭室祕藏

失血眩暈凡傷

胎去血產後去血崩中去血金瘡去血拔牙去血一切去血過多心煩眩暈悶絕不省人事當歸二

兩芎藭一兩每用五錢水七分酒三分煎七分熱服日再

婦人良方

衄血不止當歸焙研末每服一

錢米飲調下

聖濟錄

小便出血當歸四兩剉酒三升煮取一升頓服

肘后方

頭痛欲裂當歸二

兩酒一升煮取六合飲之日再服

外臺祕要

內虛目暗補氣養血用當歸生曬六兩附子火炮一兩

爲末煉蜜丸梧子大每服三十丸溫酒下名六一丸

聖濟總錄

心下痛刺當歸爲末酒服方寸匕

必效

方

手臂疼痛當歸三兩切酒浸三日溫飲之飲盡別以三兩再浸以差爲度

事林廣記

溫瘧不

止當歸一兩水煎飲日一服

聖濟總錄

久痢不止當歸二兩吳茱萸一兩同炒香去萸不用爲末蜜

丸梧子大每服三十丸米飲下名勝金丸

普濟方

大便不通當歸白芷等分爲末每服二錢米湯

下

聖濟總錄

婦人百病諸虛不足者當歸四兩地黃二兩爲末蜜丸梧子大每食前米飲下十五丸

太醫支法存方

月經逆行從口鼻出先以京墨磨汁服止之次用當歸尾紅花各三錢水一鍾半煎八

分溫服下其經卽通

簡便方

室女經閉當歸尾沒藥各一錢爲末紅花浸酒面北飲之一日一服

普濟方

婦人血氣臍下氣脹月經不利血氣上攻欲嘔不得睡當歸四錢乾漆燒存性二錢爲末

煉蜜丸梧子大每服十五丸溫酒下

永類方

墮胎下血不止當歸焙一兩葱白一握每服五錢酒

一盞半煎八分溫服

聖濟總錄

妊娠胎動神妙佛手散治婦人妊娠傷動或子死腹中血下疼痛口

噤欲死服此探之不損則痛止已損便立下此乃徐玉神驗方也當歸二兩芎藭一兩爲粗末每服

三錢水一盞煎令欲乾投酒一盞再煎一沸溫服或灌之如人行五里再服不過三五服便效

備急方

產難胎死橫生倒生用當歸三兩芎藭一兩爲末先以大黑豆炒焦入流水一盞童便一盞煎至一

盞分爲二服未效再服

婦人良方

倒產子死不出當歸末酒服方寸匕

子母祕錄

產後血脹腹痛引

荷當歸二錢乾薑炮五分爲末每服三錢水一盞煎八分入鹽酢少許熱服婦人良方產後腹痛如

絞當歸末五錢白蜜一合水一盞煎一盞分爲二服未效再服婦人良方產後自汗壯熱氣短腰脚

痛不可轉當歸三錢黃耆白芍藥酒炒各二錢生薑五片水一盞半煎七分溫服和劑局方產後中

風不省人事口吐涎沫手足癱瘓當歸荆芥穗等分爲末每服二錢水一盞酒少許童尿少許煎七

分灌之下咽卽有生意神效聖惠方小兒胎寒好啼晝夜不止因此成痢當歸末一小豆大以乳

汁灌之日夜三四度時后方小兒臍濕不早治成臍風或腫赤或出水用當歸末傅之一方入麝

香少許一方用胡粉等分試之最驗若愈後因尿入復作再傅卽愈聖惠方湯火傷瘡瘀赤潰爛

用此生肌拔熱止痛當歸黃蠟各一兩麻油四兩以油煎當歸焦黃去滓納蠟攪成膏出火毒攤貼

之和劑局方白黃色枯舌縮恍惚若語亂者死當歸白朮二兩水煎入生薑汁蜜和服三十六黃方

土當歸根氣味

辛溫無毒

主治

李時珍曰除風和血煎酒服之閃拗手足同荊芥蔥白煎湯淋洗之出衛生易簡方

當歸部選句

元陳樵詩當歸葉長映芭蕉

當歸部紀事

三國志太史慈傳孫策以慈爲建昌都尉曹公聞其名遺慈書以篋封之發省無所道而但貯當歸
孫盛雜記初姜維詣諸葛亮與母相失後得母書令求當歸維曰良田百頃不在一畝但有遠志不
在當歸也

梁書宕昌國傳宕昌國在河南之東南益州之西北隴西之西羌種也宋孝武世其王梁瓚忽始獻
方物天監四年王梁彌博來獻甘草當歸詔以爲使持節都督河涼二州諸軍事安西將軍東羌校
尉河涼二州刺史隴西公宕昌王佩以金章

續仙傳羅公遠鄂人元宗學其術不肯盡怒殺之後有使者入蜀見公遠自道姓名以蜀當歸爲寄
比元宗入蜀始悟當歸之意

雲仙雜記號州別駕竇淝以當歸爲地仙圖曰使血海增光以聚木爲杵曰號金剛骨

當歸部雜錄

博物志神農經曰下藥治病謂大黃善能除實當歸善能止痛

古今注牛亨問曰將離別相贈以芍藥者何答曰芍藥一名可離故將別以贈之亦猶相招召贈之以文無文無亦名當歸也欲忘人之憂則贈以丹棘丹棘一名忘憂草使人忘其憂也欲蠲人之忿則贈之青堂青堂一名合懽合懽則忘忿

藥譜當歸別名女二天

秦州記隴西襄城縣有牛山是出當歸

建康記建康出當歸不堪用

廣州記鄣平縣出當歸

百部部彙考

釋名

百部

綱目

野天門冬

綱目

婆婦草

通志

百條草

經驗方

百乃

經驗方

百部圖



鄭樵通志 昆蟲草木略

百部曰婆婦草能去諸蟲可以殺蠅蠹其葉似薯蕷根似天門冬故天門冬亦有百部之名二物足以相紊

本草綱目 百部釋名

李時珍曰其根多者百十連屬如部伍然故以名之

集解

陶弘景曰山野處處有之其根數十相連似天門冬而苦強但苗異爾博物志云九真一種草似百部但長大爾懸火上令乾夜取四五寸切短含嚙汁主暴嗽甚良名爲嗽藥疑此卽百部也其土肥潤是以長大也 陳藏器曰天門冬根有十餘莖圓短實潤味甘百部多者五六十莖長尖內虛

味苦不同苗蔓亦別令人以門冬當百部說不明也 蘇頌曰今江湖淮陝齊魯州郡皆有之春

生苗作藤蔓葉大而尖長頗似竹葉面青色而光根下一撮十五六枚黃白色二三月採曝乾用李時珍曰百部亦有細葉如茴香者其莖青肥嫩時亦可煮食其根長者近尺新時亦肥實但乾則

虛瘦無滋潤爾生時壁開去心曝之鄭樵通志言葉如薯蕷者謬矣

根修治

雷斅曰凡采得以竹刀劈去心皮花作數十條懸簷下風乾却用酒浸一宿漉出焙乾剉用或一窠八十三條者號曰地仙苗若修事餌之可千歲也

氣味

甘微溫無毒

甄權曰甘無毒

大明曰苦無毒

蘇恭曰微寒有小毒

李時珍曰苦

微甘無毒

主治

別錄曰欬喘上氣火炙酒漬飲之

甄權曰治肺熱潤肺

大明曰治傳尸骨蒸勞治瘡殺虵

蟲寸白蟻蟲及一切樹木蛀蟲燼之卽死殺虱及蠅蠚

陶弘景曰作湯洗牛大去虱

陳藏

器曰火炙酒浸空腹飲治疥癬去蟲蠹咬毒

發明

李時珍曰百部亦天門冬之類故皆治肺病殺蟲但百部氣溫而不寒寒嗽宜之天門冬性寒而不熱熱嗽宜之此爲異耳

附錄白并

別錄曰味苦無毒主肺欬上氣行五臟令百病不起一名王富一名箭簞生山陵葉如小竹根黃皮白三月四月採根暴乾 李時珍曰此物氣味主治俱近百部故附之

附方

暴欬嗽張文仲方用百部根漬酒每溫服一升日三服 葛洪方用百部生薑各搗汁等分煎服二合 續十全方用百部藤根搗自然汁和蜜等分沸湯煎膏噉咽 普濟方治卒欬不止用百部根懸火上炙乾每含嚙汁勿令人知 小兒寒嗽百部丸用百部炒麻黃去節各七錢半爲末杏仁

去皮尖炒仍以水略煮三五沸研泥入熟蜜丸皂子大每服二三丸溫水下

錢乙小兒方

三十年嗽

百部根二十斤搗取汁煎如飴服方寸匕日三服深師加蜜二斤外臺加飴一斤

千金方

遍身黃

腫掘新鮮百條根洗搗罨臍上以糯米飯半斤拌水酒半合揉軟蓋在藥上以帛包住待一二日後

口內作酒氣則水從小便中出腫自消也百條根一名野天門冬一名百奶狀如葱頭其苗葉柔細

一根下有百餘個數經驗方誤吞銅錢百部根四兩酒一升漬一宿溫服一升日再服外臺祕要

百蟲入耳百部炒研生油調一字於耳門上聖濟錄熏衣去虱百部秦瓦爲末入竹籠燒烟熏之

自落亦可煮湯洗衣經驗方

百部部雜錄

種樹書果樹有蠹出者以芫花納孔中即死或納百部葉林檎蛙以鐵線尋竅內鑽刺用百部

杉木釘塞之

三七部彙考

釋名

三七綱目山漆綱目

金不換綱目